

南平縣志卷之二十三

藝文

記 次卷

置三先生墓田記

明 倪朝賓

劍州故有道南祠祀龜山豫章延平三先生有司歲時駿奔執豆籩惟謹載在祀典勿闕楊李二先生苗裔昌熾餼於學宮取科名登仕譜者代不乏人獨豫章先生嗣微弱墓在羅源里守墓者皆其枝族且寥寥僅若晨星而窶更甚鮮

南平縣誌

卷之二十三 藝文

一

有讀書自振能守家學之傳者督學熊公校士劍津穆然興蓋謂豫章先生潛思力學尤爲生平所嚮往檄下捐贖鍰百金令置羅源墓田并楊李二先生之墓皆有田朝賓仰承德意亦捐俸以襄盛舉墓各買田若干畝官收其租每歲寒食遣博士員往祭於墓而分胙於其裔孫朝賓因是有感而嘆曰嗟乎世代寥邈陵谷變遷自古聖賢豪傑湮沒於荒烟斷草之中不可勝數誰與問松楸而訪遺迹者三先生學傳正脈

玩記中口氣係知府倪朝賓所撰原本作督學熊尙文撰誤矣今爲校正

與洙泗濂洛并垂天壤乃熊公墓田之舉使松楸不改邱隴常新三先生之墓得與孔林並茂其意至深遠而其功亦至偉矣哉墓田租數列於左熊公諱尙文乙未進士豐城人皇明萬歷壬子歲孟冬吉旦知延平府事古越倪朝賓立萬歷三十八年督學熊尙文捐俸金四十兩知府倪朝賓捐俸金一十兩共五十兩置羅豫章墓田熊公又捐金三十兩倪公又捐金一十兩共四十兩置羅李二先生墓田二項共買壽山里紫坑苗田一十八段年收租米七十五斛共銀九兩內除納糧差銀一兩八錢實收銀七兩二錢內派分羅銀四兩李銀三兩二錢佃人陳士壽陳榮富陳阿儒

雙塔記

明 葉向高

嘗謂文物之盛關乎氣運厥惟天行之數然乎
哉然而振起挽回其助若假於山川陵谷之效
靈而其機常握於紀綱作人者之意嚮故神精
所動地軸爲旋規創所垂天符協應此必有默
起於風氣之表而顯司乎鼓舞之權故以文翁
化蜀則褒雄接踵而蜚聲以常袞興閩則歐陽
邁倫而蹕起詎但乞靈於峨嵋灑潁岐海幔亭
斷齧嶙峋森茫紆滃侈縣屬之大觀爲賢哲之

鍾孕已哉乃形家者流以一水也而有五戶閉
藏之說故當其氣或渙而欲去則必假物以留
之凡樓觀亭垣比比而是然惟浮圖爲最勝豈
非以聳拔特起之勢可挽陵夷波靡之趨而地
靈叶吉則人傑聿興氣運轉移有司其券者與
吾鄉鐔州楊李諸大儒之所產也名勝人文並
稱雙美而邇來甲第獨遜於諸郡直指方公謀
所以振之而詢其畫於分守沈公公夙以督學
興閩而紀綱作人者也乃進諸生誦之僉謂郡

前東西溪交流直射風氣渙散人文厄塞職此之故宜建一浮圖於九龍山之巔以收東溪之水又建一浮圖於劍化閣之前以收西溪之水兩水滙合環繞郡治於形勝大壯當必有興者公曰然乃以議上兩臺兩臺□可方公捐鍰金百三十兩有奇中丞徐公捐金六十公割俸二百金以倡首繼公後者殷公助十金郡大夫而下各有捐陶公助金五十薛公助金一十梁公助金十二徐公助金四十莫公助金十二七邑

之人起而助之不戒而集乃以屬郡紳陳正謨孝廉邱憲章董其事俾諸生魏廷玉黃應元司出入浮圖一在九龍山者高七丈計金八百有奇一在劍化閣者高九丈計金一千八百有奇前各建亭閣一計金百有奇經始於萬歷三十年三月二十九日竣工於三十五年六月合而名之曰新建雙塔璀璨崑峩矗立雲表吁嗟壯哉郡之鎮矣山不築而崇水不引而迴靈氣翕聚而鬱勃不蔚爲人文者未之嘗有是歲第

南宮者二人諸生邈然咸以地軸旋而天符應不誣也顧不佞則竊以是固然矣第此役也倘非公之勤劬作人其精神之所動盪意象之所鼓舞真有超於風氣之表者以默握其權而徒爾翹首跂足以盼望於山川陵谷之効靈則峩峩灑灑頽岐海幔亭佛窟洞天參霄浴日其爲浮圖也大矣何蜀之士必以文翁化而閩之士必以常袞興也則山川陵谷猶然待人而新而謂人文之渙然更始徒有待于浮圖聳拔特起之

勢而後振是耶非耶適孝廉黃君夢瑞過白門謁不佞以記請因銓次其本末謬爲之說如此俾後之追誦公者不第夸詡於創建之跡爲郡曠觀而直窺見公意嚮之所風勵相與競爽比肩以益章公興文之烈則此雖雙塔乎其爲峴首可也公部建南久德澤入於鐔人甚深父老子弟別有頌述茲不具論公名倣烱萬歷己丑進士歸安人徐公名學聚癸未進士蘭溪人方公名元彥丙戌進士歙縣人殷公名廷樞己丑

進士華亭人郡大夫陶君名拱聖南昌人薛君名藩己丑進士順德人貳守梁君名淳順德人節推徐君名久德上饒人邑尹莫君名一魁定安人諸庀功義助者勒名碑陰

按當時勸捐督工有耆民鄔應龍徐鴻徐五十劉永明守道沈倣炳批府給帖准與冠帶以示獎勵云

南平縣儒學建立祭田記

明林 棫訓導
福寧

國家建立廟崇祀 先師內自國都外自建邑
春秋二仲凡我衣冠之族舉欣欣然有事於廟
廷犧牲玉帛罔不虔樂舞登降罔不肅匪直文
具蓋崇德報功天下萬世之心自不容已也南
平邑附郡故事丁祭咸於郡庠而邑庠唯行釋
菜禮甚涼薄矣昭格之誠不藉乎此然師生崇
報之心則有不能忽然者先是邑侯鄭君用淵
謂報禮弗稱增啟聖祠文廟羊豕各一雖儀文

南平縣誌

卷之二十三 藝文

七

視昔稍加而歸俎受釐至計以 其於 萬
歷甲戌冬友石黃先生來訓茲庠而械以戊寅
秋繼至得從先生後則見先生學政修明百廢
具舉而於此尤深歉焉然歲額難復議增乃捐
俸資二十兩九錢創立祀田又約諸生以賓興
得僑者令割坊價二十兩佐之於是丙子得□
生有梧己卯得林生大亨共銀六十兩九錢買
田十八畝二分歲收子粒銀九兩每祭文廟再
加羊豕各一二祭約銀五兩餘用以備祀文□

葺牆垣之費噫先生崇報之心亦勤矣其引長而光大之則有後之同志諸君子也若借口官物而肆其脂韋則不惟先生之罪人而亦靦然二三子之上也吾知有道者必不爲也先生名元采福之寧德人萬歷庚辰仲春吉

邑侯吳公重修南平縣學記

明 朱繼祚

南邑之有庠舊矣西出城半里許地勢夷曠人烟稠集貿易輻輳巍然翼然屹峙於其中者是也面對九峰背枕虎頭左右兩橋雙流蜿蜒下注前溪如環如帶形家謂延津第一勝地以故科第相望爲上游冠冕萬歷以前遞解遞更具載郡志自乙酉歲馮夷弗誠湮沒民居學宮亦從蕩析因循十餘稔廟貌大媿而公帑弗充當道者蒿目靡厝時則有若生員吳明俊游王庭

南平縣誌

卷之二十三 藝文

九

謝其斐奮出身任請官給簿許自募自修不費公緡不役民夫亡何時巍翼依然稠集輻輳復故諸生庶幾不遺餘力以成大功惟是啟聖祠猶見剝勢居仁由義二齋偏缺其一總簿題募所收數多而實鮮咄嗟所辦雖成而易廢此丙寅丁卯間未週八年而櫺門拉攞欲傾矣照牆弛爲平地矣瓴甃觚稜飛竇從風柱礎階砌或陷或圯泮池飽闕鞫爲茂草堂下積潦浸成沮如廟貌仍媿而公帑猶未充蒿目靡厝當事者

不殊於前曩時奮任諸生懲成功之旋毀亦爭
搖手去耳於是晉陵吳侯初下車祇謁輒愀然
曰是可以妥 先聖之靈乎既升堂閱講復愀
然曰是可以育鯤鵬而期奮飛乎因丁祭過啟
聖祠則益駭然曰是所謂剝則潰潰則散聖人
所過而趨焉者也其又何以崇隆源本而愜不
匱之孝思乎立捐修祠金十兩曰是宜首圖者
已復捐三十兩併修殿若曰是可次第及者時
教諭林君訓導靳君沈君奉命唯唯相與料費

鳩工程材辨物於是祠之棟宇柱楹門扉棹楔
匝月間犁然一新漸而殿而堂傾者扶矣弛者
築矣飛者實者陷者圮者無不繕密凝固屹立
森起塗蕪週於垣墉丹雘加於節梲蓋極鉅麗
之觀矣池積淤泥挑而濬之下受上注各得其
所環池爲檻迄於迴廊池橋有坊嚮頽今正東
西兩齋向缺今全功成而侯復以晨謁至諸博
士弟子員相率羅拜稱謝而侯乃始輾然也曰
茲何幸因已成之緒而有盡美之實乎又何幸

不費公不役民次第而舉毋矜速成而有可久之規乎非邀先聖之靈藉諸先生合心協力不及此顏額屬聯非敢期不朽也共志喜於一時而已於今歷二年餘矣侯以滿最當徵入青瓊烏臺諸生乃相與咨嗟吾儕焦唇以請而勿可得者何以不請而得之我公抑吾儕所竭蹶以圖幸而遠成者不得公孰與極盡善而垂可久耶今西望一帶稠集輻輳有倍於昔而巍然翼然其中者氣加旺焉科第人文宜鬱勃以興

漸與海內爭雄長豈第冠冕上游云爾公之功於斯爲大烏可無勒珉以永其存因更相推擇走莆中謁予索記予惟古之祭川者後海而先河爲所自出也侯修學首啟聖知所先矣補未備之懿振垂隳之緒一切皆從奉入出旣盡善而可久猶謂藉諸同心協力也侯之功則又因謙挹而益章也已且非直此也季有考月有會歲時有賑諸推置腹心渾忘芥蒂所爲成人之美而脫人於阨者無不用其極諸生在鼓舞

振德中宜乎漸服其教久而未能忘之也聞之
敬其父則子悅敬其君則臣悅焉有崇隆先
師如是而爲博士弟子者有不歡欣愛戴思垂
於無窮者武則洵哉不可以無記侯諱襄號山
公南直武進人鳴琴五載多惠政尤加意作人
如買置學田以給會課禁冶煅冶以護文脈皆
另有碑記不具述林君諱芸蓀卽予莆人馳書
序南庠廢修始末甚悉斬君諱天顏趙州人沈
君諱登瀛丹衛人首事謁請諸生爲萬汝輝游

王庭黃以裘余日旭邱亮黃都張泰祺朱朝明
陳文選謝其斐黃以任陳景璧季茂椿餘俱勒
名碑陰崇禎二年孟秋吉舉人陳國禎魏懋□
等立石

忠義祠記

明 黃 鞏主事 莆田

延平府南劍郡城之東隅漢閩越王無諸行祠在焉正德己卯泰和歐陽君鐸由夏官正郎來爲郡伯越明年旣布民政齊民心乃正神祠改行祠爲忠義祠以祀宋丞相文信公配以趙大監時賞陳少卿龍復劉寺簿沐呂總轄武林檢院琦何提刑時授事狀使者屬記鞏跼伏民畝發狀驚嘆曰茲文山先生文信公也深願執鞭乃今得附姓名容非幸與按德祐勤王詔至公

南平縣誌

卷之二十三 藝文

十三

以提刑起兵入衛明年如元軍泊顏執之北去至鎮江亡入眞州帝北去益王卽位於福安公浮海由温州達行朝除右丞相以與陳宜中異意不拜以樞密使同都督諸路軍馬開府南劍經畧江西六人者皆隸幕下叅謀募兵得數千復邵武復梅川復會昌敗元兵於鄆都遂圍贛爲元兵所襲趨循州入潮州至海豐爲張宏範所執宋尋亡公亦竟入燕以死矣南劍張睢陽然固忠臣一旅效節之地斯祠所爲立也祠及

六人故名忠義嗚呼忠義人世之大閑也天地所以定位綱常所以植立然而往往不足傾危之濟殆有說焉盧匾良醫也謀醫者庸之而別用其良顧庸醫也彼以人試我以國試彼勢亟雖有良奚施哉昔紂良費中惡來三仁無救幽王良虢石父周遂東自古庸君暗主所托爲腹心者固自謂君子不知非君子也至大壞然後君子者出以當國難斯其無所濟也熙豐而降始誤於學術之偏繼壞於羣邪之蠱扇始付君

子而樂無專功迨端平再詔恢復啟釁召禍則症已不治無待識者已知其不濟矣公猶號召諸人激以必死嘗曰父母有疾雖不可爲無不用醫藥之理此公之心也鞠躬盡瘁死而後已此公所謂成仁取義無愧者也六人者抑有感而興與公京師吉安温州皆有祠延平之祠自郡伯始固願慕之素亦感發人心第一義也主是議者巡按沈公灼大叅宋公冕憲副胡公鐸黃公昭而任成於郡伯節推陳君韶贊焉

鱗瑞亭記

明 林希元
大寺丞理

鱗瑞亭春官正郎黃子昭故藏修處也亭在
鐔城之西馬源之園園僅可盈里而效奇鬪勝
各極其能雖勤於遊覽者未能一日遍焉其君
可庵公釋官未歸憇而樂之意造物者爲己設
焉度德據形分爲十景有曰水閣書聲者乃十
景之一爲黃子故藏修處所謂鱗瑞亭也臨亭
有池歲養魚以爲常簿正賓庖取於是庚午忽
一魚青變而黃黃又漸變色若玳瑁又漸變色

若金由是三色代變若循環焉歷辛未癸酉莫
之改焉識者謂黃子曰昔白魚入舟周室以興
雀啣三鱸於講庭而楊氏相是魚也一物三變
皆成文章不在其他在而藏修之亭毋爲吾子
乎旣黃子以歲癸酉升於鄉甲戌升於司馬官
宗伯謂魚足徵也故以鱗瑞命茲亭寵瑞也黃
子謂林子曰昭瑞章祥世之恒也故頌連理吾
見於韓矣記三槐堂吾見於蘇矣予茲亭也敢
曰齊德昔人各一瑞也請與之記若何林子曰

吾與若亦猶行古之道也古之道如多麋如有
蟻如六鷁退飛螟螽蠹蜚之類並著於春秋至
鸛鵠來巢謂魯定之祥也孰曰不可說者必曰
災異何春秋記災異不記祥瑞之書也記災異
不記祥瑞何記之不足爲教也記之不足爲教
何人皆信瑞以自崇忽德而不修亂天下必自
此始黃子曰吾之志異乎是記其瑞俾予目於
斯口於斯志於斯晝若夜於斯聳乎動乎念惕
乎懼乎負是記乃可以爲教也林子聞之喜遂

索筆爲之記

禁冶文筆山記

明 陳正謨 邑人

延閩山水郡也崇崗絕巘錯峙盤拱惟西南一方峰挺秀而特出形如卓筆正當丙位兩學宮牆面此以爲勝形家謂之文筆是也異時四賢輩出倡明道學爲萬世宗章縫之士賴以興起益崇文教海濱鄒魯作於前者罔不功存社稷名垂彝鼎嗣後讀中秘魁海內若可齋游公鍾台田公等聯翩接武咸謂此峯之靈實鍾焉萬歷庚辰秋邑有大猾爇灰爲生者招集亡命潛

於峰下伐山礫石穴地爲冶大加煅煉以罔市利四址草木日就芟夷燠灼之勢包然遐邇茲峯之秀不無率然是以數年文運寢以不昌僉駭心蒿目思莫得其故甲申歲諸生廉得其狀白諸郡守當事者惑於浮詞兼之書吏爲奸謬云隔遠佯徙而實仍之以致叢黨比周斧鑿之瘠剝膚及髓文運之傷於斯極矣會蘄水徐大夫以部郎出守吾郡諸生鼓舞相率以前牘進公覽牘愀然曰山川靈秀亘古攸賴小民之利

何山不可治而獨戕文筆耶卽檄縣嚴禁堙穴
封冶永不得睥睨此土而郡貳陳公郡儲漆公
郡裡盧公咸贊公出令不可不亟也邑尹張君
教授龔公教諭軒君輩奉郡檄惟謹曩之黷貨
戕賊悉清野矣諸生復鼓舞稱慶卽謨謀曰吾
郡數百年斯文命脈得大夫一斷而全是大夫
大有造於吾郡也盍識諸謨曰天禔吾延使大
夫蒞茲土天眷吾士使大夫蒞諸土以全茲山
此山無恙則地脈全地脈全則文運昌文運昌
則士類庇焉不爲言以識之則後之人孰知此
山之賴以全其植文教而庇士類自吾大夫始
也但願諸士益砥乃業益宏乃德無負大夫作
興之惠使道德與四賢齊芳勛業與前達峻
是大夫之烈世被於吾延而斯文之永有相也
烏容以無識哉爰勒諸珉

文筆山記

明 駱天閑 邑人

吾鐔西南距郡治十五里許有山秀麗聳卓如筆爲郡邑兩庠面峯堪輿家目爲文筆郡人文若四儒挺出科第迭興論者咸詫山靈萬歷庚辰奸民就山礫石煨灰郡守徐公邑侯張公下令嚴禁山賴保全載志書刻碑記其功德業彰彰著矣崇禎己巳忽他郡奸徒復於山麓董坑張坑鑿穴爇灰山爲之枯五十餘年保全靈脈一旦剝瘠觀者靡不恫心駭目兩庠諸生動色

南平縣誌

卷之二十三 藝文

十九

錯愕曰何物奸民廼復敢踞此土以戕我地脈也相率而鳴於分守莫公郡伯范公邑侯吳公逮諸奸首廖景山劉五雲等衆懲之奸民姑爲規避遷陶於西溪之澣而竊石於此山復爲鄉民發覺候譴怒懲罪立堙其穴更著爲令俾毋得再踵奸轍以罹法網於是僉謀構亭勒石以紀盛燬屬記於不佞天閑天閑曰國家元氣惟是視文運爲濠醇而人事振興未必不關山川之儲洩不佞嘗讀詩如斯千南山蓋詠王者作

室亦取臨水面山之勝卽周家建國不憚陟嶽
降原而衛文徙都楚堂山京是望是景顧安得
謂形勝之助爲誣耶聖宮何地可無山靈呵護
又可聽其殘毀而莫之禁茲山一全於五十年
之前再全於五十年之後嗣是延人士徼惠諸
公駸駸勃起謂諸公之保全茲山者卽以培國
家元氣非耶是諸公功德之在延人士者卽其
在國家也兩大夫暨邑侯治狀載在閭閻口碑
別有頌述不佞不煩贅茲直敘其禁冶之功鏤

之貞珉以垂永久莫公諱儼臯號寅賡南直隸
松江華亭人丙辰進士范公諱汝梓號丹樸浙
江寧波鄞縣人甲辰進士吳公諱襄號山公南
直隸常州武進人癸卯鄉進士

禁燬文筆山石記

明 許聯樞 郡守

鐔昔神劍化龍之區故其山川奇偉秀麗爲東南冠郡西十五里有文筆山屹峙雲際九峯蜿蜒如奔如攫二水分流其下形家謂清淑之氣有以淳瀆足開儒林之華而疏濬乎人物之盛夙稱小鄒魯良不偶也先有頑民燬石射利日夜作黝赫狀名區勝地不意遭此劫灰萬歷丙辰官爲厲禁不已崇禎己巳復禁凡一再勒石茲有奸商徐明廷廖景山等益加熾斲諸生黃

南平縣誌

卷之二十三 藝文

二十一

以邦邱毫等呈督學吳公禁示而熾斲如故復訟之直指張公檄府詰問司農顏公司李吳公僉曰山以文筆名蓋右文也翊振人文轉旋氣運不于師帥其誰風之予惟都人士陳藝明倫稟先王之教爲國家鼎柱安所事假靈於天苞司契於地符章句小生謂彫蟲篆刻足噴風薄雲而有餘此塊然者不翅弁髦庸詎知夫天文地理人事之紀精氣相盪幻卽大塊幻也不卽一抔之土其於消長之數若影傳形聲傳響不

爽也夫如是茲山雖小不可謂非魯鳧鄒嶧之符剷奸冀土而於以扶教山川不毀則法行乃逮諸商而訊之執言已輸產課有年董坑雖實逼處此張坑則已稍遠不知扼龍脈而斷之其眇剝膚有甚焉且上欲條教導化而屢禁之勿戢儒不勝奸至是哉或未澄其源拔其根乃爾予卽解帶易金呼其人授以原值令其徙業曰今而後毋侵我地以扞我文網罪無赦事上直指公報可仍命勒石以垂永久深惟宣化右文

有司之分也崇志砥業諸士之責也異日者纒屬而起以駢章我上國昌明之會倘能傑然建柱石勲與茲山並傳於有永匪徒無負直指公倦倦率興之意卽山之屹而峙也亦藉人以重矣是爲記崇禎戊寅仲秋告

晉陵層霄陸公禁冶全山功惠碑記

明 駱天閑 邑人

九峰當延郡面城中萬戶各隨現向開門在郡
治對青山之案其見奇於二庠尤聳拔岫嶙形
勝家謂之文筆是也昔者四賢輩出豪傑賴以
興起謂此山之靈實鍾焉厥土埴壚厥石粉解
而強概可冶爲灰物賈人用穴爲爐晝夜煅煉
幾爲焦壤前任大夫屢禁不已己巳復禁凡三
勒石迨至郡伯許公解帶買山復勒石永禁眞

能爲地方留不朽矣所恨者奸商徐明廷廖景
山文敬源鶩利耽耽復串名徐廖源假誘宦族
潛於後山玉峰墩頭煅煉諸人士不能忍訟之
司理陸公愀然曰山脈連亘合郡靈淑之氣何
得輕爐鑿之况周官蜃人灰人之屬各以時巡
而禁冶而在月令仲夏令民毋燒灰及用灰南
方豈非以其物之不可以示民而火之不可以
數出乎用是重懲嚴禁褫其艷利之魄永不得
睥睨茲土諸生鼓舞稱慶卽余謀曰吾延數百

年斯文命脈得許公而留又得陸公一再斷而示無患是公之大有造於吾延不其世世爲烈乎盍以識不朽閑曰天實眷吾延多士俾蒞茲土而全山德惠有與崔嵬長峙於不敝者也昔崔公守連山石鍾復乳今公視延使峯巒有以安其藏土石有以升其英藍田之玉日烘生烟九峯之上時有光浮玉石之氣文字之輝也延自是必有粉火帝裳堊墍皇居之士熾然於其間者矣崇禎十二年孟秋之月上浣之吉

嘉慶六年七月間又有匪徒在山內盜燒石炭
邑士聞知僉呈 廣府憲蒙出示嚴禁奸人畏
懼事方中止

龍鼎齋寓記

明 龔孫棻

天壤間無一非寓也吾人以神寓形何生何滅
譬馬駕車車敗馬逸如客附舟舟泊客去凡五
官百骸吾身以內皆寓也而况身以外之物乎
至若身之寓世幼而居壯而遊東西南朔或爲
迹之所經或爲事之所羈北梁辭後庭草空花
則家且與客寓等又况垂老嶼外之僑寓乎南
劍郡城西倚龍山迤東爲龍鼎縣署建焉左爲
丞署余自辛卯冬緣子貞備員來此庭宇數椽

南平縣誌

卷之二十三

藝文

二十五

簇蒼翠於烟巒注山泉於戶牖後饒隙地培其
桃李間菽芥葵右偏舊有神祠老槐古桂交柯
挺秀牆畔修篁蔽日叅雲籬花漾彩芳池蘭芷
飛香檻席雖云官舍恰似山林披閱之暇徐挈
釋孫植杖笑語或偕知友捉筆吟詩荏苒遐方
炎寒遞嬗亦可隨寓而安也而且憑高四望山
則自仙霞武彝磅礴而來萬嶺環拱於後玉屏
九峰列翠於前水則自浦城崇安之奔濤光澤
清流之急湍滙而下會城實爲八閩扼要間嘗

稽往代之割據而傷其蹂躪仰文山之遺跡而弔其孤忠斯寓固用武之區乎又閩爲無諸荒徼自宋龜山先生傳道南來羅李諸儒衍其緒至朱子而集其成今四賢祠宇適與寓齋相對晨夕仰止私心向往竊幸斯寓又人文之邦也每念天地之大四海之廣吾人渺焉一身寓於宇內奚啻太倉粒粟巨浸浮漚所賴眉睫之際曠覽高深方寸之間儀型往哲豈無可大而可久者足娛我心不若斯寓之暫寓我身乎如以南

寓言身寓也家亦寓也山川寓夫景物者也自昔英賢寓乎道德者也天壤間何莫非寓耶噫前我而寓於斯者我不識其何人後我而寓於斯者我不知爲誰氏我亦猶前我後我者之口焉而已暫寓焉而已矣

復四賢祠記

國朝 吳穎修

延平之有四賢祠舊矣蓋肇建於宋嘉定之初云祠在九峰之麓其合而祠者楊龜山先生時郡之將樂人羅豫章先生從彥李延平先生侗皆郡人也新安朱晦翁先生熹年二十四以同安簿從遊於延平先生之門後先凡三四至至則止於李之旁舍西林院者數旬日四賢遞相統承而道不失傳朱子之書比戶誦讀於是有專祠焉閱二百餘年而寶應朱淩溪先生應登

南平縣誌

卷之二十三 藝文

二十七

以名進士來守是邦是時海宇寧一文采激揚政事之暇進諸生而與之考四賢之軼事嘆祠宇之漸卽於圯也謀所以新之不數月榛枳芟夷俎豆肅穆頓復舊觀淩溪先生於晦翁執裔孫禮尤謹云又閱百餘年順治丙申淩溪翁元孫澹子克簡以御史巡按八閩歲五月抵延平念祖德之深遠其未忘於延之士民之心者猶一日也乃稽曩者修復賢祠之由諸生抱淩溪公遺集進而言曰維延平實承四賢之教不衰

卽郡大夫淩溪公之教所相維也顧茲兵燹頻
經三賢祠數椽風雨不蔽晦翁祠榱桷無存像
坐草茆中而淩溪公有功於前賢亦且享祀缺
然諸生中心惻悻維明公克張前烈弗致淹閱
請得於修復之餘奉淩溪公從祀晦翁祠澹子
隨命諸生導而前相度遺址規其木石瓦磚之
費於三賢祠議修於晦翁祠議復別立夾室以
祀高祖淩溪公一從諸生之請云穎時奉欽恤
之命亦至延平與聞盛典興工肇舉有日逮八

月反自邵武則旣祠宇煥然恪行祀事諸生乃
請穎記始末以永不誼蓋道教衰微由於人不
知有學也不知有學而欲執夫苦饑患盜苛徧
危迫之氓問所爲師弟子統承之緒其何途之
從故有志於學道愛人則必爲之闢堂崇威儀
然後制器具物差其度數通其藝事以俟夫人
之肅然起敬也卽或歲久多變又必將易夫荒
落黷亂之陋以成堅好華鉅之觀使夫游歌講
習於其中者不啻從諸先生遊而樂聞夫絃部

之風夫始之所以立原本於其心之誠信而教之既明則莫不歸其功於始事之賢大夫而亦同其報享斯固私淑之義所引以勿替歟其以祖孫之相承而師弟子之大誼備焉家學繩繩倡動感發之所繫非區區木堅石密翬革美備之爲矣乃海隅俶擾而澹子獨力行道化則又以見學之有所本卽明察剛決稱政事之材亦皆出於儒學之用益嘆夫朱氏之德何流遠而能被也穎好觀古聖賢之言尤多致感於盛衰

之際竊願從菱溪公之詞章以達於晦翁之學而愧其末由也觀於澹子先生抑亦知所取法矣時守建濟水王道新巡建楚黃李元萃太守羸海張夙抱郡丞曲阜孔興訓倅長安張登俊節推家弟武進吳琪滋南平令三原姜修仁同與修復之事費不及民工不踰時皆可記也而家弟以學術醇茂承教於澹子先生其倡率諸生搜遺闡幽尤亟亟焉予故樂而合爲之記

重建朱文公祠記

國朝 耿定力

閩諸郡祠事徽國文公比諸闕里盛矣其在延平則以先生產尤溪最後從同安徒步受愿中先生學以故杖屨所集熏炙尤深延之人生而事之歿而祀之禮也不佞校士建州業已謁先生考亭考亭先生所卜居祚裔繁集展治有常廟貌如新已過延平則祠宇傾圮爲周視徘徊久之明年叅知王公攝守建南奏記中丞趙公侍御喻公請以郡帑羨醵因故址建之咸得報

南平縣誌

卷之二十三 藝文

三十

可遂檄郡縣鳩工庀事不日而成於是廟貌復新懔然觀聽郡守周公以不佞謬典斯文之寄來告成事屬綴數言用勒石紀焉余唯濂溪力闢草萊爲一代正學之宗伊洛繼之其說益著已而傳習既久所入亦殊譬之同處一堂而氣息異止則先生實集其成焉先生旣已默契眞傳而搜羅天地窮剔隱伏其力又足以闡發而推明之蓋濂洛之際在暘谷朝明至先生而日中天羣陰屏伏幽隱畢照明興廣厲學官歸□

統一非先生說者禁不進卽少有牴牾終從附
合則先生之學得其大也居常嘆斯道以來遞
遷靡定凡歷幾帝幾王幾保衡傅相而仲尼始
以東魯一布衣焯爍千聖總其條貫仲尼之道
一振於衰周而火於秦襍於漢佛老於六代晉
唐之間而乃再振於偏安之宋宋白濂溪諸君
子東接其傳於鄒魯而南以及於瀕海之閩而
後中原文獻十九在閩乃先生又孕百代之精
以生於閩之下邑天之意詎可知哉國家正學

河東餘姚以後日益彬彬乃閩號鄒魯自一二
往哲外不少概見將閩有遷德耶抑亦狃所習
聞不自振也夫天之於閩厚矣今習先生之業
登朝掛籍什室而九藉令留心正學豈必遜哲
前人傳曰粵無罇夫人而爲罇也故無罇今先
生之言行具在風神如見試通以孟氏尙友之
云是不雜而鄉而天下千古也郡人士旦暮拜
禮祠下而感諸大夫飭新之意以省余言今之
閩敢逆覩非昔之閩哉中丞公諱參魯四明人

侍御公諱文偉叅知公諱民順俱豫章人而督
學使者楚人不佞爲之記

重修先鋒廟記

國朝

陳新之

凡生而有功於名沒而爲民捍患禦災者民必尸而祝之千秋享祀弗替吾延李先鋒之神是也神諱係唐西平王晟之曾孫本昇州江寧人生五代間英勇絕倫所向無敵屢建奇勲至僖宗時爲招討使副王鐸軍以先鋒駐劍州劍州閩咽喉地也南唐保泰二年朱文進殺王延羲自立於福州羲弟延政自立於建州交兵累年閩中大擾南唐遣大將查文徽攻建州而先鋒

南平縣誌

卷之二十三

藝文

三十三

始自金陵出自隸於麾下師攻建安所至皆捷乘勝克邵武臨汀西及漳泉分延平劍浦沙縣初置劍州時歲在丙午乃南唐保泰四年而中朝石晉開運之三年也以陳誨爲劍州刺史而神爲先鋒大使實總軍政紀律修明延賴以安未幾福州詐傳戍兵爲亂請援於劍州節度使查文徽刺史陳誨文徽以兵應之遂爲所擒先鋒督兵趨戰奪其大將馬先進而文徽得歸繼而李仁達竊據福州宣諭使陳覺發信州兵攻

之不克達乃送欵於吳有急報言吳兵三萬取道劍州以趨福唐居民驚竄先鋒知州兵孤弱難守乃於高桐黯淡山谿險隘之處虛立旗幟大設疑兵號稱十萬張皇聲勢吳兵聞之大恐遂由古田雪峰小路徑下福唐而延又賴以安歷五代之季而民無流離播亡之憂皆神力也歿後民懷其德始立廟於今廟之前一飲食必祭凡有禱求靡弗應宋政和辛卯詔天下郡邑各以所在神廟事蹟聞其無功德於民不在祀

典者一切毀去福建提舉學事齊公太守方公以神事蹟上聞詔許存留宣和庚子睦寇猖獗既破三衢勢逼閩境延無城郭人心惶惶郡守少卿謝公率合郡官僚虔禱神前以祈默佑辛丑三月朔夜漏四鼓陰風凜栗若有兵數萬從廟出居民皆聞空中兵甲之聲望北而去旦日有自界首大豐高桐而來者其言皆然本州先期曾發鎗杖手廖仁銓等千餘人屯玉山柳家都拒賊計江南福建兩路官兵不滿五千而賊

衆自衢而來者數萬期次日交載正慮衆寡莫敵仁銓假寐夢一人披金甲跨驄馬展青旗領衆萬餘自言南劍李先鋒助國殺賊逮旦言之軍中多有夢如銓者於是衆心踴躍□而賊徒遙望旌旗蔽空若數十萬官軍鼓譟而進賊衆大敗銓守歸言大捷之日正陰兵出廟之次日也由此官僚將卒大爲鼎建廟宇以酬神恩國朝康熙甲寅耿逆之變僞都督曾養性兵抵延太守蕭來鸞開城延逆於是逆黨肆行民不堪

命先是郭公忠孝來鎮興化舟次劍浦夜夢神呼將軍者三曰山城生靈十萬其保全之當時不解何謂丙辰郭公來駐吾延登樓瞻拜儼如夢中所見不勝駭異然終不解保全之語也轉盼八月 康親王貝子統師入關長驅電掃關上潰卒擁衆延平謀欲焚掠而去郭公設法散餉以安其衆耿戚有欲閉城堅守者有欲督兵迎戰者一如其議則延民無噍類矣郭公勸其輸誠徹曉乃定會耆民金德化等咸夢先鋒示

曰大兵下降行輯寧耳於是焚香恭迓王師入境秋毫無犯駐延五日吏民安堵此固王生成之恩郭公胥衆善承之抑非神力何以得此延之賴有先鋒眞當百世不忘第廟宇年久興廢不一考始廟在前溪者爲暴水所衝神返江寧現身與判江寧侍郎蔡侯具言始末云不久廟成卽當復往劍州再立此廟實有宋寶元之二年己卯又越七十有八年爲政和之丙申郡民復拓其基而改創之上舍貢士范濬紀其事於

碑至宣和辛丑感陰兵助陣之功益加修飾建炎三年賜額靈佑紹興間加顯應英濟之號明洪武初詔去號題唐官職命有司春秋祀之康熙二十有八年秋藩伯黃公道行讌集斯樓憑欄四望念神庥之宏遠感棟宇之傾頹慨然有重修之意遂合僚屬各捐清俸共勦盛舉南邑章公甫下車力肩其事庀材鳩工始於己巳之孟冬竣於庚午之春仲新之不文聊爲撮其大畧礪石以誌不朽云是役也延平郡守吳公國

柱司馬佟公國光別駕王公璽南平邑宰章公
世德邑佐劉公个臣皆有功於斯廟者也例得
并序

南平縣誌

卷之二十三
藝文

三十七

會輔堂記

張坦
巡道
滄陽

延城郡署東有平崗一道蜿蜒而北折其頂夷曠林木陰翳爲舊時文廟基前郡守任公己亥歲立道南書院於其上以爲諸生藏修游息之所甚盛舉也但跨高建置風雨易摧甫二十年屋瓦垣牆漸多傾圮余蒞任後觀風郡縣兩學錄其尤者送院肄業並敦請前南邑宰晉陵劉君主講席而捐俸以葺其宇郡生李子章子范子急公董事旬月之內俱就完整工竣臨視諸

南平縣誌

卷之二十三 藝文

三十八

生求所以顏其堂者夫古人之學文行兼資聖門四教文居其一曾子云君子以文會友以友輔仁蓋始於文而終以仁非此不可言學也諸生誠因文而崇實行同人會聚德業相規過失相勸以斯共爲君子庶幾克踵前徽於道南書院之名可以不愧如其虛聲標榜雖摘藻揆詞而浮華致誚則非余之所望於諸生也故顏以會輔而爲之說乾隆十一年丙寅仲秋滄陽張垣易庵氏撰并書

道南書院新購書籍記

國朝 趙在田編州修

夫鷲麥菟絲非絃歌之政也鼠肝蟲臂非黼藻之材也伊昔謝華啟秀之英抽秘騁妍之彥博存古義辨章舊聞金箱玉版穆滿之所曾窺麟閣鴻都惠施之所不見翔文章之府馥馥森森登著作之庭元元本本嗚珂虎觀瘦羊博士之銜授簡免園司馬大夫之座鬱爲時棟舒作國華菽苑美談於今爲烈粵自水精匿曜赤制炳靈撫拾殘灰珍儲敝帚朱游折角匡鼎解頤延

南平縣誌

卷之二十三 藝文

三十九

君弟兄中壘父子曲臺珥筆天祿燃藜十四家章句師承九千字學童律令无咎悔亡務拾遺而補缺曰若稽古誇累牘而連篇著籍傳經均辟太常之試發言聚訟難持廷尉之平北海鄭君東君隱德菟汲郡之璣語披端門之珪書紹家法於扶風立士鄉於高密緯候兼精彳扈丹林之牒龍虵入夢赤蚩黃玉之神日馭鳴鞭樺缸失彩雷門訇響布鼓無聲雖觝排者魏有子邕而疏證者唐推冲遠禩三代兩漢之精如見

朝儀於縣蒞薈諸子百家之說惟徵物始於檀
弓羌儉歲之膏梁衆材之隳括也若夫南董不
作罕兼三長風騷旣亡疇讀千賦編年紀傳仗
遷固之上才入室升堂讓卿雲以翹秀當塗典
午而降玉塵譚清關中洛下諸賢仙葩萼跗名都
白馬飛輕蓋於西園文梓青牛發哀絃於北地
劉舍人雕龍雋旨挾策當車沈記室雌蜺奇悰
賞音擊節盧王翰墨江河萬古之流李杜文章
瑜亮一時之傑較顏轅謝前無古人禘漢宗唐

後有作者劍浦上游奧壤道學□區仙靈棲息
之邦神物飛騰之地舊有講塾名曰道南泉明
之松菊荒蕪仲尉之蒿萊掩映彳默闔茂之歲
郡守鐵嶺 廣公買山半畝考室數楹灘流塔
影含輝於庭戶之間琴韻書聲振響於溪山之
外高齋清晝勝憶蓬瀛古道斜陽喧無車焉可
以領松泉之遠韻契麋鹿之幽情然而文獻無
徵風流代謝失匡廬之面目學優孟之衣冠未
精周禮不敢題糕輕詆公羊竟同賣餅戈舂指

側莛擊錘餐呂盜田齋劉竊新漢顏似空托於
虎賁皮傳終慚其羊質而且五日三豕之訛八
病四聲之陋閻鞞婆之出典沿祈樂之舊文軋
于喑啞濫吹南郭笙竽瘵絮車斜孰執中原旗
鼓安所習而毀不見斑椽攸譏學莫便乎近其
人孫卿是勗山陰 松雲李公來守是邦猶存
積習贍玉堂於天上舊夢都非拏鐵網於海中
新陰已渺一甌孰借空思閱市之人兩版誰家
莫問叢書之地慨其固陋爲溯根源屬坐嘯之

多間進諸生而講藝揖長裾之萋萋集方領之
莘莘名山日觀七十二代之茫然奇字靈亭八
十一家之莫識爰捐鶴俸用勸鰕生無多分潤
廉泉之一勺皆甘偶藉高呼學海則百川終到
一縑爭畀竟成集腋之狐四部俄全畧似窺斑
之豹雖復穎川廷壽傳伐鼓而考鐘安定修芝
侈升堂而設饌蔑以加也不其偉歟方今璣鏡
臨軒

羲輪甄度探秘紀於龍魚符開委宛拾殘膏於

蟬蟲神守長恩朱履閭閻攷上丁仲丁之篋丹
函秩秩齊大酉小酉之山翹瞻

北極文章輝聯華蓋劇喜東來柱史氣度函關
從此經寫巾箱詞刪幣帨証黼紋於樊鼎撫螭
扁於齊尊身遊福地誇筭府之珍藏人托仙丹
滄鴻流以津逮採虞初之稗說九百家摛曼
倩之庾詞三千奏牘毫揮錦字朱英玉彩之籤
衣染爐香枚叟鄒生之筆天葩清麗才傾謝草
江花藻彩温醇光奪隋珠荆玉則桓榮車服應
南平縣誌

卷之二十三 藝文 四十二

知稽古之榮而張叔詩書長拜授經之化南邑
孝廉王朝俊太邱仲弓之德小冠子夏之風霜
戈電戟代有英姿畫棟珠簾門多慧業克襄厥
事快覩有成并紀清徽以告來喆所願鴻都之
士益繼長而增高鵠立諸生成深思而好學三
餘誦讀多來問字之車萬本流傳長舉曝書之
會

延平校武場義塚記

國朝 官志涵
邑檢人討

乾隆四十九年甲辰五月天氣清明兼旬無雨
二十一日曉起忽報東溪暴漲二丈餘高怒浪
黝黑漂流連株樹木合棟房屋一切物件不可
殫悉沿溪男女號救之聲不輟間有掙拯得活
者百之一二耳竟一日夜漲勢未平明日浮屍
蔽江遭洄洑旋渦不能直去者亦百之一二予
聞而傷之憶甲申客蘭溪過浦江邑長平和何
君子祥語予昔泊舟延平水南登岸閒步至南

南平縣誌

卷之二十三 藝文

四十三

山寺寺後一殿奉大士像一神面藍牙獠其間
棺停纍纍心惻久之意他日得官少餘薄祿當
爲瘞之今以累吾友遂於曾醒吾同年假銀五
十兩相屬予細詢其地則水東之嶽廟停柩者
廟後之老佛殿也非水南延平亦無所爲南山
寺也予歸訪老佛殿墟矣問所停棺則經官押
葬無復留者時何君量移平陽予旣無以復其
命而予亦東西奔走無緣與何君合辨寸衷耿
耿懷此忽二十年豈意今者洪水爲災屍骸遍

岸予適家居聞而瞿然曰吾乃今有以報何君矣何君所見者柩也雖未埋而皆有主者非如此纍纍不識其誰何而肉脫肢解暴露於水涯石罅真不堪見聞也乃謀之堪輿家得東校場山一片命工爲塚塋以瓴甌自延福門東嶽廟至鑿灘檢拾遺骸以臆月望日埋之其不全者若干裹以麻布環埋塚中一具頗全購缸斂之又一罐卽造塚時工所傷者易以新罐而共掩之吁何君本爲嶽廟之停柩而不虞二十年後有遭水之遺骸何君因停柩而愍之而不料遭水者並棺骸且飄零並無人焉過而問之當時予嘉何君之義故受其託而不敢辭今日感漉災之骸乃思以慰何君之心而廣何君之義獨惜何君已化去不及知此事猶幸予衰老尙存稍以無負冥冥之良友可竊附仁人君子而成此舉瘞畢設酒饌爲文以祭之且囑後人繼志而封殖之遂爲之記

延平府義塚記

國朝 廣善
鐵嶺守

嘉慶己未秋余由工曹出守延平延平本瘠土人死不能葬者久則輒以火化余下車諄切禁之其風頓息明年大水巡視郊外敗棺破甕白骨燦□□之心惻因捐俸買山若干畝命吏胥編冊籍有力之家令其各自遷葬餘則次第掩埋凡三千二百一十有一無主者居其大半中有姓氏名籍可稽揭而書之並置木榜二於郡城隍廟中以俟其後人卜地改葬庶幾一覽而

南平縣誌

卷之二十三

藝文

四十五

知也自庚申秋迄辛酉春七閱月而事竣南平孝廉王君朝俊縣尉黃君肇愈實董是役余勞二人以酒復爲文以記之俾延平之人皆曉然於火葬之非禮交相勸沮後有仁心爲質如二君者苟能修明其事踵而增之卽以此爲嚆矢焉是更余所厚望也夫延平郡守鐵嶺廣善撰

重修同仁橋記

國朝

李堯棟

郡守
山陰人

黟南同仁橋去城百里舊名黃龍成化初邑人
建之僉事伍公爲之記嘉靖初壞於水黟守彭
公澄建隆慶時復燬黟守林公梓重建有記

國朝壞於水復燬於火傾圮歷有年矣是橋地當
孔道往來者絡繹而兩岸少人居風晨雨夕問
津苦之茲荷 前府廣公在任四載修理書院
創建義學瘞埋枯骨凡有關於地方者咸捐廉
飭辦復憫覓渡之維艱冀輿梁之告成首捐廉

南平縣誌

卷之二十三

藝文

四十六

俸議修是橋較舊制更爲增高加以亭宇經營
數月而橋將告成焉忽於春仲山水夜發橋木
石墩又被冲塌邑人咸共惜之余來承乏是邦
圖成善舉仍屬孝廉王芳亭董其事但經費浩
繁裘須集腋除官捐外數尙寥寥而各邑中紳
士咸以利濟爲懷共勸盛舉各解囊捐貲隨緣
樂助俾速告竣非惟克成前政之善舉亦足以
見諸君子誼登桑梓爲善於鄉之美意也夫是
爲記